



Centro Integrado Gestão De Crise Sala De Situação

NOTA BA IMPRENSA

11 de Marsu 2021, 16H00

(Dr Rui Maria de Araújo, Kordenador Forsa-Tarefa ba Prevensaun no Mitigasaun Surtu Covid-19 iha Timor-Leste, CIGC-SS)

Ohin, loron 11 fulan Marsu 2021, hodi Centro Integrado Gestão de Crises, Sala Situação (CIGC-SS) nia naran, hakarak hato'o ba jornalista, no ba públiku tomak, informasaun hanesan tuir mai:

I. PROGRESU ATIVIDADE PREVENSAN & MITIGASAN SURTU COVID-19 IHA MUNISIPIU DILI

Husi horiseik mai ohin iha Dili, husi amostra ne'ebé rekolla iha atividade buka-tuir kontaktu-besik, iha tan 12 maka positivu:

- a) Pozitivu 1 kontaktu-besik husi kazu Bebonuk;
- b) Pozitivu 8 kontaktu-besik husi kazu sira SEFOPE;
- c) Pozitivu 2 kontaktu-besik ho kazu Ministerio Finansas & Ministériu Transportes e Comunicaçãu;
- d) Pozitivu 1 iha aldeia 4 de Setembru, Tasi Tolu, Dili.

Ho nune'e, kazu detetadu ka positivu iha Dili, hamutuk hotu 36, fahe ba foku/agrupamentu/cluster hanesan tuir mai:

- a) BTN II-Terra Santa, Suku Madohi: kazu 6.
- b) Aldeia Gólgota, Madohi: kazu 3.
- c) Aldeia Lurumata, Suco Madohi: kazu 2.
- d) Aldeia 4 Setembru, Comoro: kazu 1.
- e) Aldeia Fomento I, Suku Comoro: kazu 3.
- f) Aldeia 05, Suku Fatuhada: kazu 3.
- g) Bebonuk: kazu 2.
- h) Delta: kazu 1.
- i) Ministériu Finansas: kazu 3.
- j) SEFOPE: kazu 9.
- k) Ministériu Transportes e Comunicaçãu: kazu 2.
- l) Hospital Nacional Guido Valadares: kazu 1.

36 kazu iha cluster 12: instituisaun 4, Suku 4. iha Postu Administrativu D. Aleixo.

II. PROGRESU HUSI ATIVIDADE PREVENSAUN & MITIGASAUN SURTU COVID-19 IHA MUNISIPIU COVALIMA.

1. Serka sanitaria iha Munisipiu Covalima hapara ona, atividade iha Suai vila, no postu administrativu sira, eseptu Fatumea hahú la'ó normal, maibé eskola ho administrasaun públika foin maka bele hahú funsiona hirak iha segunda-feira oin mai.
2. Ohin iha Postu Administrativu Fatumea, deteta hikas pozitivu nain rua, ho CT entre 39 ho 42 –signifika iha ona faze rekuperasaun- husi kontaktu- besik nain rua ne'ebé halo sira nia segundu teste. Ho nune'e, kazu iha Fatumea sae ba 15.
3. Ekipa konjunta saúde sei nafatin buka-tuir kontaktu-besik husi kazu pozitivu sira iha Fatumea.

III. PROGRESSU ATIVIDADE PREVENSAUN & MITIGASAUN SURTU COVID-19 IHA MUNISIPIU SIRA SELUK NO RAEOA.

Husi horiseik mai ohin, ekipa saúde nian iha munisipiu 10 & RAEOA rekolle hamutuk hotu 193 amostras iha atividade vijilánsia sentinella. Amostra hirak ne'e hotu haruka ona mai Laboratoriu Nasional de Saúde no sei iha hela prosesu análise.

IV. DADUS JERAL:

- 1) Kazu foun: 14.
- 2) Kazu rekuperadu: 0.
- 3) Kazu ativu: 65.

V. ESPLIKASAUN ADISIONÁL

Aproveita oportunidade atu esplika ba públiku tomak konseitu KONTAKTU-BESIK. Wainhira deteta kazu konfirmadu ida, presiza buka-tuir ema hotu ne'ebé hala'ó kontaktu-besik ho kazu ne'e. Tama iha kritériu kontaktu-besik ema hotu ne'ebé:

1. Iha kontaktu, ka hasoru malu ho ema ruma ne'ebé rezultadu teste pozitivu, durante ka liu 15 minutos, iha distánsia menus husi metru 1, bele iha uma-laran, ka bele mós iha liur;
2. Moris hamutuk iha uma ida ho ema ruma ne'ebé rezultadu teste pozitivu;
3. Tu'ur iha distánsia kadeira rua ho ema ruma ne'ebé teste pozitivu, iha transporte públiku terrestre, iha ro-ahi ka iha aviaun;
4. Hamutuk iha fatin sira hanesan uma-laran, ka fatin sorumutuk, ho ema ne'ebé iha rezultadu teste pozitivu durante liu oras rua nia laran;
5. Halo kontaktu fiziku ho ema ne'ebé rezultadu teste pozitivu, sein uza ekipamentu protesaun individual halo loloos;
6. Halo atendimentu ba paciente pozitivu sein uza ekipamentu protesaun individual halo loloos;

Ekipa konjunta saúde nia iha terrenu agora fokus liu iha rekolla amostra husi kontaktu-besik, tuir kriteriu ne'ebé defini iha leten, hodi nune'e bele hakotu korrente transmisaun iha foku/agrupamentu/cluster hirak ne'ebé temi ona iha leten. Ita sei iha amostra atus-ualu

resin, maka hein ninia rezultadu. Tan ne'e laboratoriu PRESIZA FOKUS BA EMA NE'EBÉ KONTAKTU-BESIK ho sira ne'ebé pozitivu.

Sira ne'ebé la prienxe kriteriu 6 ne'ebé temi iha leten, favor ida lalika preokupa demais. Importante maka nafatin pratíka métodu ijiéne no protesaun pessoál ne'ebé esplika bebeik ona.

VI. APELU

1. Husu ba populasauñ iha Dili laran tomak, atu nafatin kalma, lalika pániku, halo tuir regra konfinamentu domisiliáriu jeral, ba populasauñ rezidente iha Munisipiu Dili, fo'ó tempu ba ekipa konunta saúde buka tuir kontaktu-besik sira hotu.
2. Maski Governu deside ona atu hakotu serka sanitaria, hakarak apela ba populasauñ iha Covalima, atu nafatin disiplina iha medidas protesaun no ijiene pessoál, no evita hakat ba-mai iha fronteira.
3. Apela mós ba populasauñ Timor-Leste tomak, liu-liu iha munisipiu sanulu seluk ho RAEOA tu'ur hakmatek iha fatin, atu nafatin matan-moris neon nain, pratíka nafatin medida sira ne'ebé ita hotu hatene ona: (a) Uza mascara; (b) fase liman beibeik ho sabaun ka dezinfetante ruma; (c) evita kose liman ba matan, inus ho ibun; (d) wainhira kumprimenta malu, lapresiza ka'er liman, bensa-liman, rei-malu ka haku'ak malu; (e) evita halibur malu barak; (f) hamri'ik ka tur do'ok husi ema seluk, mínimu metru ida ho balun.

-ninin no rohan-

RMA